

Lecture HSA 506 - Faavae o le Malo o Samoa

O le Tulafono sili a le malo o Samoa, ta'ua foi o le Tulafono aupito maualuga, o le tusiga ua faaigoaina o le Faavae o le Malo Tutoatasi o Samoa. O lena tusiga ua avea ma faavae o lona malo, muamua i lona pulega mai le tumutumu e aulia le tautua e lagolagoina le pule. Na tapena mai lena faavae i le 1954 ma le 1960, i fono ua ta'ua o fono faavae, pasia le faata'otoga faaiu i le 1961 ae faamamalu lona tausiga ia Ianuari 1962, ina ua folafola le malo tuto'atasi.

E mafai ona fai ni suiga poo ni teuteuga i le Tulafono e ala i le ioega a se luavaetolu o le palemene.

I le tusi a JW Davidson, Samoa mo Samoa, ma lena a Lauofo Meti, o loo faamauina ai le tala o lena tapenaga o le faavae. E leai se taimi tatou te o i ai i ona auiliiliga ae afai e fia fai ai sau su'esu'ega i le lumana'i, e te maua le atoaga i tusi na e lua. Ae le ta'ua faamaumauga a le Fono Faitulafono ma isi foi molimau tusitusia.

O le malosia o le Faavae o Samoa e leai sona tua'oi tagata, lotu, talitonuga, agaifanua, poo le a lava se pule i totonu o le laueleele ua ta'ua o Samoa, se'i vagana motu na i lalo o le pulega a Amerika Samoa. O lena malosia e le paoina e na mea sa ta'ua, se'i vagana lava o le pule a le luavaetolu o le palemene, poo le palemene atoa foi.

E 12 vaega o le Faavae:

E iai nei

1. Malo Tuto'atasi o Samoa ma le Tulafono sili
2. Aia Tatau Faavae
3. O le Ao o le Malo
4. O le pulega faatonu
5. Palemene
6. Ofisa o Faamasinoga
7. Aufaigaluega o galuega a le malo
8. Mea tau Tupe
9. Fanua ma Suafa
10. Pulega o Faalavelave Tutupu
11. Tulaga faasalalauina ma Itu Eseese
12. Soloaiga

O teuteuga i le faavae

Ou te le o mautinoa le aofa'i o teuteuga i le faavae, pau lea o le tele o teuteuga sa faia i le taimi na tula'i mai ai le HRPP, e aofia ai nisi teuteuga na vesia ai le atunuu (controversial). O le tasi o lena o le tofiga o le Ao o le Malo, e manatu nisi ua ave ese ai malosiaga o le pule sa iai i le tofiga aupito maualuga i le atunuu.

O le teuteuga o le faavae na sui ai le faiga e tofi ai ulumatagaluega mai le mea sa iai i le faakonekarate, ta'i tolu tausaga. Faapena i isi tautua a le malo e iai pulea'oga mo se faata'ita'iga.

Mo le Palemene, o le suiga mai le 3 tausaga o se paea'iga i le 5 tausaga. O le pasia o le kuota 10 pasene mo tamaitai e ulufale i se paea'iga, o se 'ai lea mo i latou, tusa i nisi finagalo.

O suiga i lalo o le Vaega 6 Ofisa o Faamasinoga, o loo vesia ai pea le lotoifale o upufai a Samoa. O le suiga lea ua mafai ai ona tuto'atasi le faamasinoga o fanua ma suafa, e le o masuiga malie, ona sa folafola e le malo o iai nei lo latou te'ena o lea suiga.

Ma isi lava teuteuga ma aafiaga e tula'i mai ai, o na ua tou silafia. E le lava se taimi tatou te asiasi i ai i lea vaega i ona auiliiliga.

Ou te fia ta'ua se tasi o teuteuga lea na toe sui ai upu o le Faatomuaga, e faaopoopo ni upu, e faamanino ai le tulaga lenei, o Samoa o le malo Kerisiano e talitonu i le Atua Tolu Tasi poo le Atua o Peresona e Tolu. Ia, e tofu a le tagata ma lana faauigaga o lena suiga, e fuafua lava i sona talitonuga faalotu pe faaupufai foi.

E iai le vaega lenei o le Faavae e tuese mai ai o se Tulafono e limata'ita'iina ai le soifua o tagata Samoa. O le Vaega 2, Aia tatau Faavae. A ta'u le upu aia tatau e vave ona fesoota'i le mafaufau ma le tagata e to'atasi. Ma o se luafesasi lea o loo feagai pea ma tagata o Samoa e tusa i le Faavae.

Manatua sa tatou talanoa i le aganuu fuaao - e tula'i mai ai se faiga fou o pulega e fefiloi ma feuluulua'i. E iai malosiaga i lea faiga, ae e iai foi ona vaivaiga. Ae pei ona ou ta'ua, o soo se faiga lava e le atoa se selau pasene.

Avatu se ata faataitai, ana se mea e malilie o tatou taitai e faaoga le na o le pule tuai (tu ma aga ma Tulafono faamatai) Lona uiga e pei tatou o malo Muselame, e leai se leo e amana'ia, e sau mai luga le faatonuga, na o le usita'i lava ma fai. Ailoga tatou te manana'o i se na faiga.

Ae I lenei faiga ua tuufaatasi ai mea fou ma mea tuai, ua maualafia ai le tagata, ma faatonutonu ai foi pulega mai le faaoga sese o le paoa.

Ae pei ona ou fai atu, e leai se faavae e atoatoa, tusa foi pe taulagi o le Atua o lo tatou faavae, ae ua na o le upu ma le gutu, aua e lei fai mai le Atua e faavae lo tatou malo ia te ia, o tatou lava.

A manatu foi o le Atua e paia ma atoatoa a o tatou e le oo i lena maualuga, ona popole ai lea. ('aua e te ta'u fua) . E manaia le 'anava a le malo o Amerika - In God we trust, matou te talitonu i le Atua.

Ae o se faasoa puupuu lena i le tatou mataupu o lenei afiafi, e le lanu lenei mataupu I se faasoa se tasi, aua e felefele ana faia, e le gata I le Tulafono a o aafiaga faalenuu, tamaoaiga,

upufai, ma soo se vaega o lo tatou soifuaga. Pau lea, ia tatou manino ia tatou aia tatau o loo puipuia I lalo o lo tatou faavae. E taua lou silafia lelei o lo tatou faavae aua o le Tulafono sili lea o loo tou soifua ma tatou ola ai.